

## 10. gr.

*Ráðningar.*

Við ráðningu starfsmanns í flokki B og C skal fylgt reglum Háskóla Íslands um ráðningu sérfræðinga. Stjórn stofnunarinnar ræður starfslið í flokkum D og E og framkvæmdastjóri starfslið í flokki F. Ráðning sérfræðinga skal vera til rannsóknarstarfa. Kennsla þeirra við háskólann skal háð samkomulagi milli deildarráðs og stjórnar stofnunarinnar, og skal þá m.a. ákveðið, hvort kennslan skuli teljast hluti af starfsskyldu viðkomandi sérfræðings.

## 11. gr.

*Gildistaka.*

Reglugerð þessi öðlast gildi 5. september 1999 og fellur þá jafnframt úr gildi reglugerð nr. 537/1975 með áorðnum breytingum.

*Háskóla Íslands, 16. desember 1999.*

**Páll Skúlason.**

*Þórður Kristinsson.*

16. desember 1999

Nr. 897

**REGLUR****fyrir Hugvísindastofnun Háskóla Íslands.**

## 1. gr.

*Almennt.*

Við heimspekideild Háskóla Íslands starfar Hugvísindastofnun Háskóla Íslands á grundvelli 2. mgr. 9. gr. laga nr. 41/1999, um Háskóla Íslands, og rammareglugerðar um stofnanir við deildir Háskóla Íslands sem samþykkt var á fundi háskólaráðs 18. desember 1997.

## 2. gr.

*Hlutverk stofnunarinnar.*

Hlutverk stofnunarinnar er:

- a. Að vera samstarfsvettvangur rannsóknastofnana heimspekideildar (sjá 4. gr.), annast sameiginlegt skrifstofuhald þeirra og þjónustu við þær.
  - b. Að vera vettvangur fyrir þverfagleg rannsóknaverkefni, oft tímabundin, sem vinna má að í sérstökum rannsóknastofum sem heyra undir stofnunina (sjá 4. gr.).
  - c. Að veita nemum í rannsóknanámi aðstöðu og búnað til rannsóknastarfa.
  - d. Að veita stúdentum þjálfun og reynslu í vísindalegum vinnubrögðum með því að gefa þeim kost á að vinna rannsóknastörf.
  - e. Að skapa rannsóknáðstöðu fyrir gistiprófessora, sérfræðinga og unga vísindamenn eftir því sem unnt er.
  - f. Að gangast fyrir ráðstefnum, námskeiðum og hvers kyns annarri starfsemi á fræðasviði deildarinnar.
  - g. Að sinna þjónustuverkefnum á fræðasviði deildarinnar.
  - h. Að veita aðstoð og þjónustu við bókaútgáfu, t.d. í samvinnu við Háskólaútgáfuna.
- Öllum þessum verkefnum skal stofnunin sinna í samvinnu við hlutaðeigandi rannsóknastofnanir og stofur, eftir því sem við á (sjá einkum liði c, d, e, f, g og h hér á undan).

## 3. gr.

*Vísindalegar kröfur og aðstaða.*

Háskóli Íslands veitir stofnuninni starfsaðstöðu, svo sem húsnæði og búnað. Stofnunin veitir þeim kennurum deildar sem þess óska, svo og öðru starfslíði (sjá 5. gr.), aðstöðu og nauðsynlegan búnað til rannsókna, eftir því sem unnt er. Stofnunin skal uppfylla þær kröfur af gæði og afköst sem heimspekideild setur henni.

## 4. gr.

*Skipulag stofnunarinnar.*

Hugvísindastofnun rekur sameiginlega skrifstofu fyrir rannsóknastofnanir og rannsóknastofur innan heimspekideildar. Skrifstofunni er stjórnað af framkvæmdastjóra (sjá nánar í 8. gr.).

Hugvísindastofnun skiptist í fimm faglega sjálfstæðar einingar: Bókmenntafræðistofnun, Heimspekistofnun, Málvísindastofnun, Sagnfræðistofnun og Stofnun í erlendum tungumálum, en þær starfa samkvæmt starfsreglum sem stjórn Hugvísindastofnunar setur þeim.

Ennfremur getur stjórn Hugvísindastofnunar með samþykki ársfundar (sbr. 9. gr.) lagt til við deildarfund að komið verði á fót rannsóknastofum til að sinna þverfaglegum rannsóknaverkefnum. Á sama hátt getur stjórnin lagt til að rannsóknastofa verði lögð niður, t.d. þegar því rannsóknaverkefni er lokið sem stofnunni var ætlað að sinna eða ef fé fæst ekki lengur til starfsemi hennar.

Hugvísindastofnun greiðir í Rannsóknasjóð Háskólans ákveðið hlutfall af öllum tekjum af þjónustuverkefnum samkvæmt nánari ákvörðun háskólaráðs.

## 5. gr.

*Starfslíð.*

Við Hugvísindastofnun geta starfað:

Prófessorar, dósentar, lektorar og fastráðnir stundakennarar heimspekideildar, ásamt framkvæmdastjóra og skrifstofufólki.

Aðrir sem stjórn veitir starfsaðstöðu, svo sem gistikennarar, sérfræðingar, nýdóttorar, framhaldsnemar, stúdentar og aðstoðarmenn.

## 6. gr.

*Stjórn.*

Stjórn Hugvísindastofnunar er skipuð níu mönnum eins og hér segir:

- a. Einum fulltrúa frá hverri hinna fimm rannsóknarstofnana heimspekideildar, kosnum á deildarfund til þriggja ára.
- b. Tveimur fulltrúum stúdenta úr hópi framhaldsnema í heimspekideild, kosnum á deildarfund til eins árs, og skal annar þeirra að jafnaði vera úr hópi nemenda í doktorsnámi og hinn úr hópi nemenda í MA-námi.
- c. Einum fulltrúa utan deildar, sem skal valinn af rektor og skipaður til tveggja ára.
- d. Formanni sem deildarfundur kýs til þriggja ára.

Stjórnin markar stofnuninni stefnu. Hún fjallar um öll sameiginleg málefni stofnunarinnar, hefur umsjón með fjármálum hennar, semur rekstraráætlanir, tillögu um fjárveitingar og skiptingu þeirra, ásamt skiptingu annarra tekna. Ráðning starfslíðs stofnunarinnar skal vera í höndum stjórnar. Stjórn sker úr vafaatriðum er upp kunna að koma og varða innri starfsemi stofnunarinnar.

## 7. gr.

*Stjórnarfundir.*

Formaður stjórnar boðar stjórnarfundi með dagskrá. Skyld er að hafa stjórnarfundi óski tveir eða fleiri stjórnarmenn þess, jafnframt ef rektor eða deildarforseti óska þess og hafa þeir þá málfrelsi og tillögurétt á fundinum. Framkvæmdastjóri á sæti á stjórnarfundum og hefur þar málfrelsi og tillögurétt.

## 8. gr.

*Framkvæmdastjóri.*

Framkvæmdastjóri annast daglegan rekstur stofnunarinnar. Hann sér um framkvæmd þeirra mála sem stjórn felur honum. Stjórn setur framkvæmdastjóra erindisbréf þar sem nánar er kveðið á um verksvið hans. Framkvæmdastjóri skal hafa meistara- eða doktorsgráðu eða annað sambærilegt háskólapróf.

## 9. gr.

*Ársfundur.*

Stjórn efnir til ársfundar með starfsmönnum stofnunar, þar sem ársskýrsla er lögð fram. Á ársfundi, sem að jafnaði skal haldinn á haustmánuðum, skal leggja fram fjárhagsáætlun næsta árs. Seturétt á ársfundi hefur stjórn stofnunar, prófessorar, dósentar, lektorar, akademískir starfsmenn sem ráðnir eru til rannsóknarstarfa, svo og aðrir starfsmenn stofnunarinnar.

## 10. gr.

*Fjármál.*

Tekjur Hugvísindastofnunar geta verið:

- a. Framlag úr ríkissjóði eftir því sem kveðið er á um í fjárlögum.
- b. Framlag af rannsóknafé heimspekideildar.
- c. Styrkir til einstakra verkefna.
- d. Greiðslur fyrir umbeðin verkefni.
- e. Tekjur af útgáfustarfsemi.
- f. Aðrar tekjur t.d. gjafir.

Í þeim tilvikum sem starfsmenn afla rannsóknastyrkja til að vinna verkefni á vegum Hugvísindastofnunar beint, eða á vegum einhverrar af þeim rannsóknastofnunum sem heyra undir hana, skal gera samning við stjórnanda verksins um hlutdeild Hugvísindastofnunar og hlutaðeigandi rannsóknastofnunar af styrknum vegna kostnaðar við stjórnun og þjónustu. Sama gildir um þjónustuverkefni sem eru unnin á vegum Hugvísindastofnunar eða rannsóknastofnana innan hennar.

Reikningshald Hugvísindastofnunarinnar skal vera hluti af reikningshaldi Háskóla Íslands. Fjárhagsáætlun ber að samþykka á deildarfundi.

## 11. gr.

*Gildistaka.*

Þessar reglur eru settar samkvæmt heimild í rammareglugerð um stofnanir við deildir Háskóla Íslands og með samþykki háskólaráðs hinn 16. desember 1999, og gilda til fimm ára.

*Háskóla Íslands, 16. desember 1999.*

**Páll Skúlason.**

*Þórður Kristinsson.*